

Echl'escret d'chol qu'al sorit toudis

Ene métchène perfoaite

Chol Lee-Ann al étoait ène jomalisse indépindante: al foaisoait dz erportages vidéo pou des grandes gazettes anmétrichaines. Al étoait à tcheuze d'ho toudis in route à virvourander drochi drolà pis al avoait in tiot dronne qu'a s'in sarvoait pou li prinne edz angues ed vueye espéciales su ches thinmes qu'al erbéyoait. Quante qu'al avoait défini in erportage, al tchittoait sin tiot dronne dins s'cambe, qu'ale étoait grande assez pou li sarvir étou d'estudio d'montage pou sn ouvrage. Al avoait lonmé sin dronne conne si qu'il étoait 'té sin tiot : Babeagle (Tiot aigue).

Al restoait dins in grand apartmint dins New-York, acq des grandes plaques pis des muralles gaïantes ed tchèques mètes d'heuture.

Chol Lee-Ann al étoait ène chélibataire ed ches tans d'asteur : ha vut dire qu'al avoait in « amisse espécial » eutermint dit « in amisse foqu'pou cotronner » ; al foaisoait foqu'dévoler ch'dragon acq li ed tans en tans. Al étoait trop indépindante pou li s'erloyer définitivmint à quéqu'in. Pis al avoait trop tcherre à mener ches gins alintour ed li : rapport à ho, sn amisse espécial i pavoait nin durer Lee-Ann pus eq tchèques hures par moès.

Ainsin, sin tiot dronne Babeagle, il étoait conne in tiot idéal pou li : toudis à suivre es ordes, toudis brave quante qu'al li dmandoait tchèque cose, toudis sins li s'aloter dins s'cambe in coep qu'al étoait d'ertour d'erportage.

Peut qu'manquer, ha foaisoait lonmint qu'chol Lee-Ann qu'ale voloait avoèr étou ène métchène.

Rapport qu'esn amisse espécial qu'il étoait point vramint in anmoureux clachique acq eltchel qu'al porroit départir es viye , a s'sintoait étou fort seu dins sin grand apartmint à ch'mitant d'New-York, acq toutes ches grandes batisses alintour d'es prope grande batisse. Al pinsoait ainsin qu'al porroit pourfiter d'ène métchène pou li camanetter acq li, tout l'tans, edvant d'd'aller à sn ouvrage obin dré qu'al étoait ervénu d'esn ouvrage.

Pis a s'avoait dit qu'in s'acatant ches sarvices d'ène métchène, al séroait infin débarachèye ed toutes ches taques donmechtiques qu'al avoait nin tcherre à foaire.

Al o ainsin traché aprins chom meillèuse métchène possible su chl'intarnet, ène qu'al saroait tour tout foaire pis tout li amouter pis , coèr in coep, trébin proler

Al pavoait mi pus attinne ech jour duqu'a d'alloit arriver. Ch'o 'té in mardi per matin, ch'jour qu'il o cangé s'viye.

Chom métchène Lee-Ann al étoait egzastémint conne eq chol Lee-Ann qu'al el voloait : toute tiote, ronde... Al pavoait point ène buque contchurincer s'biellète à li. Eus noirete couleur al trantchoait acq sin sorire timide. Os étoait dit qu'h'étoait tchécun probabelmint d'ech Sénégal, ed chon noirete Afrique duqu'o perle francès. A s'lonmoait Alexandrinne. Ches tiotès files in Afrique francophone il ont sovint des viux noms francès. Al avoait foqu'in oeul. Al esplitchoait pus tard qu'al avoait vénu au monne ainsin, acq foqu'in oeul.

Mains pou Lee-Ann, tout il étoait conne a s'l'avoait émaginer. Al avoait asteur es métchène, qu'a d'alloit pavoèr ecmander conne in varlet à mon d'ches gins ergintés.

Chov viye au prison

Dré ch'preume jour pis parèlmint par après, chol Lee-Ann al o bouté s'métchène dins s'cambe, duqu'y avoait in cartchuleu erloyé per wifi à in saquant d'canméros qu'i miloaitte ches 4 plaches d'esn apartmint. Sin cartchuleu il étoait méné acq el voèx d'sin moaite : chol Lee-Ann al butchoait ainsin ralmint su sin cleftier : al ecmandoait sin cartchuleu in li perlant, conme in varlet ectronnique !

Chol Lee-Ann al o étou fort habile impéché chl'Alexandrinne ed vidier s'cambe, hermis quante qu'a l'acondusoait dins s'cusène obin dins s'plache-à-ban. Echl'Alexandrinne a s'o ainsin ertrouvé tout rade conme au prison, attatchèye per in long combe d'afourage ectrique.

In puque, drè sn arrivèye, chol Lee-Ann al o perlé à chl'Alexandrinne conme à in tchien pis al i dmandoait sovint des choses fort simpes, qu'al étoait point ieu bson d'ène métchène pou li zzé foaire. Par egzimpe, echl'Alexandrinne al devoait li bailler l'hure qu'il étoait, al devoait li dire ch'tan qu'i foaisoait à l'cour, al devoait li dire ches nouvielles per matin pis per soèr, al devoait s'otchuper d'sin canepin pi li ramintuver ses rindez-vous tout l'tans.....

Quant qu'al rintroait d'esn ouvrage à vièpe, chol Lee-Ann a d'alloyait direcminit dins c'cambe, al boutoait sin dronne dins sin racoin conme à l'accoutumèye pis a s'débilloait fort habile edvant chl'Alexandrinne, conme ho, sans ène buque d'ahontage. Echl'Alexandrinne al étoait conme forchèye ed prinne part à ho pis d'raviser chl'espectaque ed chol Lee-Ann mernute, qu'a s'rindoait minme pus compte qu'es métchène qu'a l'ravisoait. H'est vrai qu'ale étoait bellotte, chol Lee-Ann, acq sin bieu tiot corps ed fanme ed quarante chonq innèyes, acq ses têtes d'ène bielle talle mains qu'i tchéyoaité légèrmint, acq es choune sans caveu qu'al étoait conme in bieu tiot trait vertical qu'i décopoait ainsin ch'bos d'sin buche.

A s'boutoait tout l'tan pindant d'longuès mineutes edvant sin long miloèr in forme ed rectangle, pis a s'tornoait dins tous ches sins pou li vir, si qu'toute qu'il étoait conme i feuloait. Sin tchul il étoait fort bieu étou pis chor roeulette ed sin tchul al desséparoait parfaitmint in dux sin cantieu.

Echl'Alexandrinne al ravisoait ho tous ches jours aprins chl'ouvrage ed Lee-Ann.

Pis al devoait par après el vir es pourmèner conme ho mernute dins sn'apartmint. Conme qu'al avoait in aboutage à tous ches canméros grache à ch'cassi d'ech cartchuleu d'choc cambe, al pavoait vir chol Lee-Ann d'aller d'ène plache à ène eute, conme ho, sans rhabillure.

Quante qu'al voloait foaire el pétcheume, chol Lee-Ann, toudis mernute, a d'alloyait tcherre es métchène dins s'cambe, a l'boutoait dins in racoin d'es cusène, a l'rattatchoait acq ech combe ectrique, pis chl'Alexandrinne al devoait tracher dins s'tiète pis dire tout heut dz erchettes. Alfoès al devoait bailler dz erchettes d'echz Anmériques, alfoès al devoait bailler dz erchettes d'Urope, coèr d'eutes foès, h'étoait dz erchettes d'Afrique obin d'Ansie qu'al devoait bailler. Es métchène al étoait nin fort bielle mains al avoait ène grande chervelle pis a s'ramintuvoait d'toute. H'est pou ho qu'al savoait sitant d'erchettes.

Mains al pavoait nin foaire chop pétcheume li-minme. Y avoait foqu'chol Lee-Ann qu'al avoait ch'droèt d'marmitonner. Pis aprins, chol Lee-Ann al matchoait toute seu, dans s'bielle plache, in ravisant ch'posse, aprins avoèr raconduit pis rattatché s'métchène dins s'cambe. Stapindant, chl'Alexandrinne al voyoait toudis toute, grache à ches canméros erloyèyes à ch'cartchuleu. Ha, chol Lee-Ann, a l'savoait point !

A ch'momint d'd'aller à schlofe pis d's'adover, chol Lee-Ann al edmandoait toudis à s'métchène d'li lire tchèques pages d'in live, conme ho, tout heut.... Alfoès, al voloait acouter dom meusique, adon al ecmandoait à chom métchène ed bouter ches canchons qu'al avoait tcherre.

Pis aprins chol Lee-Ann al disoait à quelle hure qu'al voloait t'ête dérinvillèye ...pis a s'adovoait infin.

Echl'Alexandrinne al avoait ch'droèt d'déurmire seulmint in coep qu'sin moaite qu'a s'avoait incleumi.

Per matin, aprins qu'al o dérinvillé sin moaite acq ène fort douche meusique, echl'Alexandrinne al devoait dire tout heut à sin moaite ch'tan qu'i d'alloyait foaire, ches dernes nouvielles pis drochi étou ches rindez-vous dins sin canepin ectronnique. Adon chol Lee-Ann a s'désatchoait d'sins lit, forchèmint mernute, pis al edmandoait à s'métchène ed foaire découler ch'jus qu'al avoait aperté ech jour d'avant. Sans vidier choc cambe, chom métchène al pavoait foaire ho, coèr in coep, grache à ch'wifi, rapport qu'ech molin à café ectronnique qu'il étoait erloyé étou à ène intique wifi. Pis chol Lee-Ann al prindoait s'métchène dins chop plache-à-ban duqu'al l'rattatchoait nateurèlmint acq ech combe d'afourage ectrique, pis h'étoait erparti pou chl'espectaque ed chol Lee-Ann mernute, edvant, pindant pis aprins chod douche. Chob basse-campe al étoait étou dins chop plache-à-ban pis ha l'inbarachoit nin d'foaire poupoute edvant s'métchène. Echl'Alexandrinne al devoait indurer tout ho pis al avoait adon foqu'à ch'momint-lo ch'droèt à in tiot pis habile erlavage. Mains h'étoait chol Lee-Ann qu'a l'erlavoait intièrmint. H'étoait vramint abachant!

Maugré tout ho, chl'Alexandrinne al avoait tour ène bielle voèx, agréabe à intinne, sans ène buque d'ersintimint. Os étoait dit qu'al sorioait toudis quante qu'al s'edvisoait.

Echl'agibieltèye ertrouvèye

Quante eq chol Lee-Ann qu'al dégriloait sus chl'intarnet dins s'cambe - qu'hétoait ch'seu momint qu'a s'sarvoait d'ech cleftier d'sin cartchuleu - , chl'Alexandrinne, edpus ch'racoïn d'choc cambe duqu'al dévoait dmorer, al voyoait toute étou.

Chol Lee-Ann al passoait pis rapassoait sin tan in line à toudis acater d'eutes rhabillures pis espécialmint des queuches. Al acatoait étou trébin d'marottes pis d'serre-têtes ed toutes ches couleurs pis d'toutes ches sortes qu'ale éprouvoait forchémint dvant ch'miloër d'es cambe dré qu'il arrivoait. H'étoait coër in espectaque sans parfin pou chl'Alexandrinne.

Echl'Alexandrinne al connochoait asteur tanmint bin chan qu'chol Lee-Ann qu'al avoait ch'pus tcherre qu'al pavoait adviner li-minme ches choses eq sin moaité qu'al voloait. Chol Lee-Ann al avoait mi pus à s'sarvir d'ech cleftier d'sin cartchuleu. Sovint, chol Lee-Ann al ecmandoait minme direcmin à chl'Alexandrinne ches commissions qu'al dévoait foaire. Adon chom méchène al ecmandoait ho in line pis tout il arrivoait sans qu'chol Lee-Ann qu'al euche mi à hindger ène buque.

Ech boutique in line qu'al avoait ch'pus tcherre i s'lonmoait «Chol qu'al sorit toudis », rapport qu'al pavoait vramint y trouver tout chan qu'al avoait faim d'acater.

Echl'Alexandrinne al avoait ermertché qu'ech pus grand plaisi d'Lee-Ann il étoait d'hutcher chz agints d'ech « service pratique », pou leu berler dsus, minme quante qu'al étoait bénache d'esn acatis. Al avoait jusse tcherre à agonner ches paures impoyès qu'il étoait ed l'eute coeuté d'ech téléphone. Al pavoait alfoès lzes décasser pis lzes bourieuder acq des mots sitant durts qu'echz agints i définissoait per braire

Tout duchmint, chl'Alexandrinne a s'o aperçu qu'al connochoait quasi toute su sin moaité : asseuré qu'al connochoait tous racoïns d'sin corps mains asteur étou tous ches racoïns d'esn anme: tout chan qu'al matchoait, cmint qu'a s'arangeoait, chan qu'al acoutoait, chan qu'al ravissoait, chan qu'al lisoait, duqu'al dégriloait su chl'intarnet, chan qu'al foaissoait toute choj jorneye.... Chov viye ed sin moaité al avoait mi pus d'escrèt : h'étoait dévnu comme in grand live défreumé....

Piot-à-piot, chl'Alexandrinne al o prind fiata in li-minme pis al o volu éprouver d'erprinne esn agibieltèye.

In coep qu'sin moaité qu'al étoait nin lo pis qu'al avoait tchitté dins s'cambe sin dronne, chl'Alexandrinne al o aderché à prinne contrôle d'ech cartchuleu Lee-Ann in émitant s'voèx.... Pis par après, al o étou prind contrôle d'echl'iPad Lee-Ann in s'sarvant d'Siri, qu'h'est in busintchilage qu'i permet d'ecmander tn iPhone obin tn iPad acq et voèx. Comme ech dronne qu'il étoait méné per chl'iPad, ch'Alexandrinne al o pu démarer chl'osieu à élèches... Il étoait tiot adon il étoait possible pou li d'violer sans russe in d'dins chl'apartémint.

A chl'ecminchmint, chl'Alexandrinne al i o cmandé d'd'aller dins tous ches plaches d'echl'apartémint. Al o exploré in détail tous ches racoïns, acq choc canméro ahotchèye su ch'dronne

Pis par après, al o overt ène ed ches ferniètes qu'al étoait étou cmandèye per ch'cartchuleu tout unimint in li dmandant acq es voèx.

Pis lo, pou ch'preume coep dpus in saquant d'smainnes, al o pu vidier ch'batimint duqu'al étoait au prison pis violer tchèques mineutes pa-dsus li grâche à ch'dronne.

Maugré qu'al étoait toudis erloyèye acq ech combe d'afourage ectrique, echl'Alexandrinne a s'o ainsin dit qu'al pavoait asteur foaire quasi tout chan qu'al voloait, sitant qu'a d'alloit point long d'echl'apartémint Lee-Ann acq ech dronne, pou li nin perde echl'erloyage acq ches cmandes wifi d'echl'iPad.

Echl'ervanque

Quant qu'al o rintré à sn apartémint à vièpe, ech jour-lo, chol Lee-Ann al o ieu conme in drole d'ersintimint : toute il étoait conme à l'accoutumèye mains al trouvoait qu'tchèque cose il avoait cangé.

Al o déclatché à rire quante qu'al o vu qu'ech patchet qu'al avoait erchu d' « Chol qu'al sorit toudis » y avoait dux jours d'ho qu'il avoait 'té erlivré coèr in coep. In constinote al avoait 'té totalmint bénache ed chan qu'al avoait acaté mains conme à sn abitude, al avoait hutché ch' « sarvice pratique » pou li s'foaire plaisi pis al avoait berlé tanmint fort conter echl'agint in line ech jour d'edvant qu'echl'agint i nn'avoait tcheu in favélote : h'étoait sin collègue agint qu'il avoait dévu définir echl'hutchage téléphonique. H'étoait vramint in esploè pou chol Lee-Ann d'avoèr aderché à décasser tchécun ainsin !

Adon chol Lee-Ann al o erprind s'routène : débillage dins s'cambe, foaisage ed chop pétcheume, matchage dins chob bielle plache, ravisage d'ech posse, acoutage ed canchons dins sin lit pis incleumage....

Stapindant, à ch'mitant d'ech soèr, aladon qu'sin moaite qu'al deurmoait fort parfondémint, chl'Alexandrinne al o cmandé à chl'iPad, tour acq es voèx fort soriente, ed démarrer sin dronne in mode escret ; ha vut dire qu'echz éliches qu'i tornoaité sans foaire trébin d'carpint. Os étoait dit qu'des mouques qu'il étoait in route à brouire, werre puque qu'ho.....

Acq esn agrape ahotchèye d'sus li, ch'Babeagle il o sui chz ordes d'echl'Alexandrinne pi il o overt echl'huche ed choc cambe pi il o d'allé dins choc cusène. Su in d'ches meubes ed choc cusène, y avoait quatre grands coutieux étampis dins in bieu morchieu d'boès tallé pou zz éternir.

Ech « Babeagle » il o prind in coutieu grâche à sn agrape pis il o ervirolé dins ch'sins d'choc cambe.

In coep qu'il étoait dins ch'cambe, i s'o bouté jusse pa-dsus chol Lee-Ann tout lonque ech plafond, à quatre mète ed chop plainne. Chol Lee-Ann al étoait in route à deurmire su sin dos.

Echl'Alexandrinne al o adon alleumé ch'quinqet d'ech cambe, qu'il étoait étou erloyé per ch'wif, pou li prinne part à chl'espectaque qu'i d'alloit vénir.

In coep qu'il o ieu intindu chl'orde baillé per chov voèx tour soriente d'echl'Alexandrinne, ch'Babeagle il o tchitté tcherre ech preume grand coutieu qu'il o attierri à ch'mitant d'ech buche Lee-Ann : il o tranché choj jonne fanme d'in coep pis ch'sanque il o cminché à djiler.....

Chol Lee-Ann a s'o dérinillé tout rade, conme butchèye per ène angouche point croyabe à sin buche. A l'o toutché pou li s'aperchuvoèr qu'al pardoait trébin d'sanque pis a s'o éboulé à berler tanmint qu'al avoait mau.

A l'adon qu'al coichoait pis qu'al berloait, chl'Alexandrinne al o cmandé à ch'Babeagle d'ertorner dins choc cusène pou li erprinne in eute coutieu. Ha li o prind seulmint tchèques ségondes .

Chol Lee-Ann al o torné s'tiète vers chl'Alexandrinne in coep qu'al o ieu comprind qu'h'étoait li qu'al avoait ahansé tout ho. « Décasse tout ho, qu'al tchémandoait chol Lee-Ann ! Pourquoi qu'té m'foais ho ? Ecmin qu'h'est-ti possible ? Ti, Alexandrinne ! » Pis lo, a s'o éboulé à cracher du sanque.....

Asteur ech Babeagle il avoait ervénu pis i s'étoait ertrouvé coèr in coep pa-dsus chol Lee-Ann. Pis il o tchitté tcherre ech deusse coutieu qu'il o toutché ch'coep-chi chog gargatte Lee-Ann. Conme ho, al povoait mi pus berler.

In troisiinne coep, chl'Alexandrinne al o cmandé à ch'Babeagle d'ertorner dins choc cusène pou li erprinne in eute coutieu.

Chol Lee-Ann al o pu vir duqu'ech troèsiinne coutieu qu'il d'alloit l'butcher : s'bouque. Minme si qu'al povoait fort diffichilmint respirer acq eus gargatte tranchèye, chol Lee-Ann al wardoait coèr es bouque grande overte conme pou li éprouver d'prinne ed l'air.

Pis h'est lo qu'ech derne coutieu qu'il o tcheu, in li s'infitchiant dins s'bouque pis in l'escofiant tout rade.

Echz ziux Lee-Ann il ont dmore tout grand défreumés maugré qu'al étoait asteur morte.

Echl'intchète per ches cadoreux

Ene collègue-fanme ed Lee-Ann, chol Lindsay - qu'al étoait étou sn amisse ed leu jonne tan – al avoait rindez-vous acq li ech jour aprins qu'al avoait défuncté.

Al pavoait nin croère eq chol Lee-Ann qu'al séroait à l'artage ech jour-lo. H'étoait in erportage fort important pis al s'avoait engagé à arriver timpe au matin.

A l'o hutché su sin fin portabe quasi dix coeps : point ène buque ed rinflique! Rin du toute!

A tcheuze qu'al étoait djo dévu arriver y o dux hures d'ho, s'collègue a s'o rindu à sn apartmint pou li vir chan qu'i s'passoait.

Al o sonné pis butché à chl'huche almins vingt coeps : toudis point ène buque ed rinflique !!

Al o adon d'allé à ch'conchierge pou li dmander d'raviser si qu'toute i d'alloait bin.

Quante qu'il o ieu overt echl'huche, y avoait in chilinche total dins chl'apartémin.

Ech conchierge pis chol Lindsay i leus ont acminé direcmin vers chob cambe.

Echl'huche al étoait overte.

Pis lo il ont démuché chl'espectaque ed queuchmar : su ch'lit, ch'corps mernut ed Lee-Ann, trécopé per troès grands coutieux d'cusène dins ène bache ed sanque gaïante.

Chol Lindsay al o erconnu chl'Alexandrinne, qu'chol Lee-Ann qu'al perloait trébin d'li. Os étoait ieu doutance ed rin !

Chol Lindsay al o hutché ches cadoreux tout rade : il ont arrivé tchinsse mineutes pus tard!

Ech connichoir princîpa i l'o dmandé à chz agints d'chop poliche chiintifique ed raviser dins tous ches racoins d'echl'apartmint si qu'y étoait des sinnes obin des traches minmes fort tiotes ed perzinche umainne qu'i séroité point ceusses ed chol Lee-Ann. Rin du toute !

Ech connichoir il o adon ermertché qu'ech cassi d'ech cartchuleu qu'il étoait coèr overt.

Il o ravisé in molé drochi drolà su ch'burieu d'ech cartchuleu pis i l'o comprind grache à chz iconnes ed ches busintchilages qu'i voyoait qu'chol Lee-Ann qu'al dévoait inrégistrer chan qu'ches canméros qu'i filmoaité. In constinote, chol Lee-Ann al wardoait toudis ches dux dernes jornèyes filmèyes dins chor raminvrance d'ech cartchuleu. Pitète qu'i d'alloait ainsin comprinne chan qu'i s'avoait passé.

I li o follu tchèques mineutes pou li comprinne eq chov voèx qu'al avoait cmandé à ch'dronne ed tchitter tcherre ches coutieux su chol Lee-Ann qu'al vénoait d'echl'Alexandrinne.

Mains lo, ha avoait n'tiête en tcheuye !

Echl'Alexandrinne, h'étoait nin in gin comme ti pis mi, mains h'étoait in simpe appareil comme chos sarvante-à-voèx « EchoSpot » qu'ène boutique in line contchurinte ed « Chol qu'al sorit toudis » qu'i vind. Eutermint dit, il étoait d'edvise d'in varlet ectronnique obin d'ène métchène ectronnique eq sin vrai nom dins ch'conmerche qu'h'est « Alexa » pis qu'o cmande normalmint in disant tout heut « Alexa, foais tchèque cose..... ».

Peut qu'manquer, « Alexandrinne » h'étoait ch'surpitchet qu'chol Lee-Ann qu'al dévoait avoèr baillé à s'métchène ectronnique.

Mains tout ho ha esplitchoait point pourquoi qu'chom métchène ectronnique - eq ch'est foqu'in appareil sans viye - qu'al avoait prind ch'controlé d'ech dronne pou li escofier chol Lee-Ann. In constinote, in sarvant-à-voèx comme « Echo Spot », h'est foqu'ène métchène ectronnique qu'al foait normalmint foqu'suire echz ordes qu'al erchut d'gins comme ti pis mi. Pis h'est toute!

Pou ch'connichoir, y avoait tchèque cose qu'il étoait fort drole dins tout ho.

Il o ainsin continwer sz ertrachages pi il o ravisé dins chz inrégistrémints vidéo coèr 1 jour pus timpe in trachant dins ch'tubin d'ech burieu d'ech cartchuleu duqu'echz inrégistrémints dpus ed dux jours qu'il étoaité. Pis lo il o tcheu su chz écanges téléfonniques inter chol Lee-Ann pis chl'agint d'ech sarvice pratique qu'al avoait sitant durtémint burieudé.

I s'o dit qu'i dévoait y avoèr in loyin inter tout ho.

Echz agints d'chop poliche chiintifique il ont ainsin déchidé d'intchèter ch'minme jour tchèques hures pus tard dins ch'sarvice pratique ed « Chol qu'al sorit toudis » dins Seattle pis il ont ertrouvè chl'agint qu'il avoait perlé acq chol Lee-Ann tchèques jours pus tôt. I s'lonmoait « John ».

Dré qu'il o vu ches cadoreux d'aller vers sin burieu, ch'John il o panitché pis il o épreuvé d's'infwir rapport qu'il avoait comprind qu'i d'alloait fort habile foaire ech loyin inter li pis chl'escofiage ed chol Lee-Ann. Mains ches cadoreux il ont définit per l'estoper pis per l'bouter au prison.

Tchèques jours pus timpe, ech John i s'avoait in consture sinti tanmint abaché par chol Lee-Ann quante qu'a l'avoait décaissé per téléfonne qu'il avoait déchidé d'el mourdrir in prindant contrôle ed chom méтчène ectrique dins choc cambe à mon d'chol Lee-Ann pis par après in cmandant à sin dronne ed l'escofier acq troès coutieux.

Pour nn'in définir.

D'après intinne dire, edpus tchèque tan, ch'boutique in line « Chol qu'al sorit toudis » i milroait ses pratiques touteoute ches canméros d'ches sarvants-à-voèx ectronniques qu'i leu vind, pou li connoaite chan qu'il ont tcherre. Adon i leu pourpose des coses à acater quante qu'i dégrioltés su sin wèpe in leu amoutrant des réclames chiblèyes su ches minmes coses qu'il o erpéré in lzes milant.

Chom morale ed nous histoère drochi h'est qu' « Chol qu'al sorit toudis », acq esn affoaire ed connerche in line qu'i décesse nin d'forchir pis étou asteur acq ches métchènes ectronniques qu'al nous vind, al o prind ch'contrôle ed nous viye pis al put nous berziller complèmint.

Acq des sarvants-à-voèx ainsin, os ont totalmint perdu nous viye privèye rapport eq « Chol qu'al sorit toudis » qu'al resse asteur in d'dins nous moaison pis qu'al nous mile ed timpe au matin dusqu'à tard à vièpe.

Il est tan d'nous étampir pis d'erprinne ech contrôle ed nous viye.

Boutons à l'cour tout chan qu'i put suivre chan qu'o foait, chan qu'o dit, chan qu'oz o tcherre, cmint qu'o vit..... Erdévnons libes, comme avant !

Ermerque : chi-dsous in egzampe ed sarvante-à-voèx vinduye per Amazon, ch'contchurint d'ech boutique in line « Chol qu'al sorit toudis » qu'il est in boutique in line eq j'o émaginé. Ej m'o sarvi d'ech modèle « Echo Spot », comme protagonisse princhipa d'emn histoère « Echl'escret d'chol qu'al rit toudis ». Tout ersanage acq des personnages qu'il ont egzisté obin qu'il egzisté il est parfaitmint vrai.



Vogabulaire – vocabulaire

Picard	Français
« Chol qu'al sorit toudis »	« Celle qui sourit toujours »
A ch'mitant	Au milieu
A l'adon qu'	Alors que
A l'artage	En retard
A l'cour	Dehors
A tcheuze d'	A cause de
A tcheuze qu'	Du fait que
Abachant	Humiliant
Abaché	Humilié
Abitude	Habitude
Aboutage	Accès
Acatant	
Acaté	Acheté
Acatis	Achats
Acatoait	Achetait
Aconduisoait	Accompagnait
Acoutage	Ecoute
acouter	Ecouter
acoutoait	Ecoutait
acq	Avec
aderché	Réussi
adover	Endormer
adovoait	Endormait
Adviner	Devenir
Agibièltèye	Liberté
Agint	Agent
Agonner	Faire souffrir
Agrape	Crochet
ahansé	Organisé
Ahontage	Honte
Ahotchèye	Accrochée
Aladon qu'	Alors que
alleumé ch'quinquet	Allumé la lumière
Almins	Au moins
aloter	Bouger, secouer
Amisse	Ami(e)
Amisse foqu'pou cotronner	Fuck-friend
Amouter	Montrer
Angouche	Douleur
Angues	Angles
Anme	Ame
Anméritchaine	Américaine
Anmoureux	Amoureux
apartémint	Appartement
apartmint	Appartement
aperchu	Aperçu
aperchuvoèr	Apercevoir
aperté	Préparé
Apparel	Appareil
arangeoait	Préparait
Arrivèye	Arrivée
Arrivoait	Arrivait

Arrivoaité	Arrivaient
Asseuré qu'	Il est certain que
Attachèye	Attachée
Attinne	Attendre
Avoait 'té	Avait été
baillé	Donné
Bailler	Donner
Basse-cambe	Toilettes
Bellotte	Mignone
berlé conter	Crié contre
Berler	crier
Berloait	Criait
Berziller	Détruire, casser, abîmer
Bielle plache	Salon
Bielltèye	Beauté
Boès	Bois
Bos	Bas
Bouque	Bouche
Bourieuder	Violenter
bouté	mis
Boutique in line	Magasin en ligne
Boutoait	mettait
Boutons	Mettons
Braire	Pleurer
Brave	Gentil, sage
Brouire	Bruire
Buche	Ventre
burieudé	Violenté
busintchilage	Logiciel
Butcher	Frapper
Butchèye	Frappée
Butchoait	Frappait
Cadoreux	Gendarme
Camanetter	Discuter
Cambe	Chambre
Canepin	Calepin
Cangé	Changé
Canméro	Caméra
Cantieu	Fesses
Carpint	Bruit
cartchuleu	Ordinateur
Cassi	Ecran
Chélibataire	Célibataire
Chiintifique	Scientifique
Chilince	Silence
Choune	Sexe féminin
Clachique	Classique
Cleftier	Clavier
cmande	Commande
cmandé	commandé
cmandèye	Commandée
cminché	Commencé
Coèr in coep	A nouveau
Coeuté	Côté
Coichoait	souffrait
Combe d'afourage ectrique	Câble d'alimentation électrique
comprind	Comprend
Comprinne	Comprendre

Conchierge	Concierge
conmerche	Commerce
Connichoair	Commissaire
Conmissions	Commissions, courses
Connochoait	Connaissait
Contchurincer	Concurrancer
Contchurinte	Concurrente
Continwer	Continuer
Cratcher	Cracher
Croère	croire
Cusène	cuisine
D'aller à schlofe	Aller se coucher
D'alloait tcherre	Allait tomber
D'après intinne dire	A ce que l'on dit, d'après ce que l'on dit
D'ertour	De retour
Débarachèye	Débarassée
Débillage	Déshabillage
débillait	Déshabillait
décassé	Cassé
Décasser	Casser
Décesse	Cesse
déchidé	Décidé
déclatché à rire	Eclaté de rire
Décopait	Découpait
découler	Couler
défini	Fini
Définir	Finir
Définissoait	Finissaient
Définitivmint	Définitivement
Défreumé	Ouvert
défuncté	Décédé, mort
Dégrioloait	Glissait, surfait
départir	partager
dérinillé	réveillé
dérinvilleye	Réveillée
Derne	Dernier
désatchoait	Détachait, tirait
Desséparoait	Séparait
Deurmîr	Dormir
Deurmoait	Dormait
Dévoait	Dévait
dévoler ch'dragon	Avoir des relation sexuelles
dévu	Du
diffichilmint	Difficilement
Direcmint	Directement
Djiler	Couler
Dmandant	Demandant
dmandé	Demandé
Dmandoait	Demandait
dmoré	Resté
Donmechtique	Domestique
Douche	Douche
Dré qu'	Dès que
Drochi	Ici
Drochi drolà	d'ici de-là
Droèt	Droit
Dronne	drône
Duchmint	Doucement

éboulé à	Mis à
Ecange	Echange
Ecmander	Commander
Ecmandoait	Commandait
ecminchmint	Commencement, début
ed queuchmar	Cauchemardesque
Ed tans in tans	De temps en temps
Edmandoait	demandait
Edvant d'	Avant de
Egzastémint	Exactement
éliche	Elice
Eltchel (acq eltchel)	Lequel
Emaginer	Imaginer
Emitant	Imitant
épreuvé	Essayé
Epreuver	Essayer
Epreuvoait	Essayait
Erboyait	Considérait
Erchette	Recette
erchu	Reçu
erginté	Riche
Erlavage	toilette
erlavoait	Lavait
erlivré	à nouveau livré
Erloyage	Action de relier
Erloyé	Relié
erloyer	Relier
erloyèye	Reliée
erloyèyes	Reliées
ermerque	Nota bene
ermertché	ermarqué
Eroait 'té	Aurait été
Eroait bson	Aurait besoin
Eroait ieu doutance ed	Se serait douté de rien
erparti	Reparti
erpéré	Repéré
Erportage	reportage
erprind	reprend
Erprinne	Reprendre
Erténir	Retenir
Ertorner	Retourner
Ertrachage	Recherche
ertrouvé	retrouvé
Ertrouvèye	Retrouvée
ervanque	Revanche
ervénu	Revenu
ervénu	Revenu
ervirolé	Volé à nouveau
Escofiage	Action de tuer quelqu'un
Escofiant	Tuant
Escret	Secret
Espectaque	Spectacle
Esplichait	Expliquait
Esplitchroait	Expliquerait
Esplòè	Exploit
Estoper	Stopper
Estudio	Studio
Etampir	Dresser, lever

Etoait d'edvise d'	S'agissait de
Etoaité	Etaient
Eutermint	Autrement, sinon
Eutermint dit	Autrement dit
faim d'	Envie de
Favéolte	Syncope
Ferniète	Fenêtre
Feuloait	Fallait
Filmoaité	Filmaient
Fin portabe	Smartphone
Foire dégouter	Faire couler
Foire eul pétcheume	Faire la cuisine
Foire poupoute	Faire ses besoins
Foisage	Action de faire quelque chose
Foisait	Faisait
Foès	Fois
Forchèye	Forcée
Gaïant	Géant
Gargatte	Gorge
Gazette	Journal
Hermis	Hormis
Heuture	Hauteur
Hindger	Faire un geste
huche	Porte
Hutchage	Appel
hutché	Appelé
Hutcher	Appeler
Iconne	Icône
impêché	Empêché
Impoyé	Employé
In coep qu'	Une fois que
In constinote	En effet
In puke	En plus
In route à	En train de
inbarachait	Embarassait
Incleumage	Le fait de s'assoupir
incleumi	Assoupi
Indépindante	Indépendante
Indurer	Supporter, endurer
Infin	Enfin
infitchiant	Enfonçant
infwir	Enfouir
ingagé	Engagé
Inrégistrémint	Enregistrement
Inrégistrer	Enregistrer
Intarnet	Internet
Intchète	Enquête
Intchèter	Enquêter
Inter	Entre
intèrmint	Entièrement
Intique	Prise
Jornalisse	Journaliste
Jornèye	Journée
Légèrmint	Légerement
Leus ont acminé	Se sont dirigés
li-minme	Elle-même
Lisoait	Lisait
Live	Livre

lonmé	Nommé, appelé
Lonmint	Longtemps
lonmoait	Appelait, nommait
Loyin	Lien
Marmintonner	Mitonner
Maronne	Pantalon, culotte
Matchage	Action de manger
Matchoait	Mangeait
mau	Mal
Maugré que	Malgré que
méné	Mené, dirigé
Méner	Mener, diriger
Merdi	Mardi
Mernute	Nue
Métchène	Servante
Meusique	Musique
milant	Epiant, observant
Mile	Epie, observe
Miloaitte	Epiaient, observaient
Miloèr	Miroir
Milroait	Epierait, observerait
Mitant	Milieu
Moaison	Maison
Moaite	Maître
Moès	Mois
Morchieu	Morceau
Mourdrir	Assassiner
Muralle	Mur
Nateurelmint	Naturellement
Nouvelles	Nouvelles
Orde	Ordre
osieu	Oiseau
otchuper	Occuper
Ouvrage	Travail
overt	Ouvert
Pa-dsus	Par-dessus
panitché	Paniqué
Par egzimpe	Par exemple
Pardoait	Perdait
Parelmint	Pareillement, de la même manière
Parfondémint	Profondément
parmet	Permet
Passoait pis rapassoait	Passait
Pachet	Paquet
perlant	Parlant
Perle	Parle
Perloait	parlait
Perzinche	Présence
Pétcheume	Cuisine
Peut qu'manquer	En fait
Pinsoait	Pensait
Piot-à-piot	Peu à peu
Plache	Pièce
Plache-à-ban	Salle de bain
Plainne	Sol
Point ène buque ed	Pas une once de
Porroait	Pourrait
Posse	Poste

Possibe	Possible
Pourfiter	Profiter
pourméner	Promener
pourpose	Propose
Povoait	Pouvait
Povoèr	Pouvoir
Pratique	client
Princhipa	Principal
prind fiate	Prend confiance
Prindoait	prenait
Prinne	Prendre
Prinne part à	Prendre part à
Probabelmint	Probablement
Proler	Parler, bavarder
Quasi	Presque
Queueche	Chaussure
Racoin	coin
raconduit	Reconduit, réaccompagne
Ralmint	Rarement
Ramintuver	Souvenir
ramintuvoait	Souvenait
Raminvrance	Mémoire
Rapport qu'	Du fait que , eu égard au fait que
Raspirer	Respirer
rattatché	Attaché à nouveau
rattatchoait	Attachait à nouveau
Ravisage	Action de regarder
ravisant	Regardant
ravisé	Regardé
Raviser	Regarder
Ravisoait	Regardait
Resse	Habite
Restoait	Habitait
rhabillure	Habits
Rindez-vous	Rendez-vous
rindoait	Rendait
rindu	Rendu
Rinflique	Réponse
rintré	Rentré
Rintroait	Rentrait
Roeulette ed sin tchul	Raie des fesses
Routène	Routine
russe	Difficulté
Sanque	Sang
sarvant	Servant
Sarvice pratique	Service client
Sarvices	Services
sarvir	Servir
sarvoait	Servait
Savoait	Savait
Séroait	Serait
Serre-têtes	Soutien-gorge
Sinne	Signe
sintoait	Sentait
Sorire	Sourire
Sovint	Souvent
stapindant	Cependant
Suire	Suivre

surpitchet	Surnom
Talle	talle
Tans d'asteur	Epoque actuelle
Taque	Tache
Tchécun	Quelqu'un
Tchémandoit	Démandait, quémandait, suppliait
Tchèque cose	Quelque chose
tcherre	Tomber
tcheu	Tombé
tcheu in favélote	Tombé en syncope
Tcheuye	Queue
Tchéyoaité	Tombaient
Tchinze	Quinze
tchitté tcherre	Laissé tomber
Tchitter tcherre	Laisser tomber
Tchittoait	Laissait
Tchul	Cul
Téléfonne	téléphone
Téléfonnique	Téléphonique
Tête	sein
Thinme	Thème
Tiête	Tête
torné	Tourné
tornoait	Tournait
Tornoaitté	Tournaient
tous ches	Chaque
Tout heut	Tout haut
Tout l'tans	Tout le temps
Tout lonque	Tout contre
toutché	Touché
Touteoute	Au travers de
Trache	Trace
traché aprins	Cherché
Tracher	Chercher
Trantchèye	Tranchée
Trantchoait	Tranchait
Trébin	beaucoup
Trouvoait	Trouvait
Umainne	Humaine
Varlet	Valet, serviteur
vénu au monne	Né
Vidier	Quitter
viroler	Voler
Virvourander	Promener
Viye	Vie
voèx	Voix
volu	Voulu
Voyoait	Voyait
Vramint	Vraiment
Vuye	Vue
Wardoait	Gardait
Werre puque qu'ho	Guerre plus que cela